



11. december 2009

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpuga:

Naalakkersuisut nuna tamakkerlugu ukiut tullit qulit sanaartugassatigut sunik pilersaaruteqarpat?

Kommune-it peqatigalugit aningaasaleeqatigalugillu sanaartornikkut sunik pilersaaruteqartoqarpa?

(Inatsisartunut ilaasortaq Isak Hammond, Inuit Ataqatigiit)

Tungavilersuutit:

Nunarput isorartoorsuummat siunissaq eqqarsaatigalugu sanaartornikkut erseqqissumik sunik pilersaaruteqartoqarnersoq sunillu ingerlatsisoqassanersoq maannakkut ersarluttutut oqaatigisariaqarpoq.

Talittarfiit, inissiat, ikuallaaviit, utoqqaat illui, atuarfiit nutaat, atuarfiit iluarsaanneqartussat, erngup nukinganik nukissiuutit, utoqqaat illui iluarsaanneqartussat, tamakkuninnga sanaartornissaq eqqarsaatigalugu siunissaq qanoq pilersaaruteqarfigineqarnersoq paaserusunnarpoq

Maannakkut inissiat illullu iluarsaanneqartussat aserfallatsaalineqartussallu kinguaattooqqasut nalinginnaasumillu iluarsaanneqartussat qanoq pilersaaruteqarfigineqarnersut aamma paaserusunnarpoq.

Namminersorlutik Oqartussat tamakkiisumik aningaasalerlugit aammalu kommunit suleqatigalugit sanaartugassaat ukiuni qulini tullerni suunersut qanorlu pingaarnersiuilluni pilersaarusiortoqarsimanersoq kissaatiginarpoq sukumiisumik paasissutissiissutigineqassasut.